

四庫全書

集部

欽定四庫全書

集部

御定全唐詩卷四百六十一
三至六

詳校官庶吉士臣胡鈺

主事銜臣徐以坤覆勘

總校官知縣臣繆琪

校對官中書臣高 中

謄錄監生臣徐秉敬

欽定四庫全書

御定全唐詩卷四百六十三

胡杲

胡杲安定人懷州司馬詩一首

七老會詩

杲年八十九

閒居同會在三春大抵愚年最出羣霜鬢不嫌杯酒興
白頭仍愛玉爐熏
襄回玩柳心猶健老大看花意却勤
鑿落滿斟判酌酊香囊高挂任氤氲
搜神得句題紅葉

望景長吟對白雲今日交情何不替齊年同事聖明君

吉皎

吉皎馮翊人衛尉卿致仕詩一首

七老會詩

皎年八十八

休官罷任已閒居林苑園亭興有餘對酒最宜花藻發
邀歡不厭柳條初低腰醉舞垂緋袖擊筑謳歌任褐裾
寧用管弦來合雜自親松竹且清虛飛觥酒到須先酌
賦詠成詩不住書借問商山賢四皓不知此後更何如

劉真

一作負

劉真廣平人磁州刺史詩一首

七老會詩

真年八十七

垂絲今日幸同筵
朱紫居身是大年
賞景尚知心未退
吟詩猶覺力完全
閒庭飲酒當三月
在席揮毫象七賢
山茗煮時秋霧碧
玉杯斟處彩霞鮮
臨階花笑如歌妓
傍竹松聲當管弦
雖未學窮生死訣
人間豈不是神仙

鄭據

鄭據滎陽人右龍武軍長史詩一首

七老會詩

據年八十五

東洛幽閒日暮春邀歡多是白頭賓官班朱紫多相似
年紀高低次第勻聯句每言松竹意停杯多說古今人
更無外事來心肺空有清虛入思神醉舞兩回迎勸酒
狂歌一曲會娛身今朝何事偏情重同作明時列任臣

盧真

盧真范陽人侍御史內供奉詩一首

七老會詩

真年八十三

三春已盡洛陽宮天氣初晴景象中千朵嫩桃迎曉日
萬株垂柳逐和風非論官位皆相似及至年高亦共同
對酒歌聲猶覺妙玩花詩思豈能窮先時共作三朝貴
今日猶逢七老翁但願醪醕常滿酌煙霞萬里會應通

張渾

張渾清河人永州刺史詩一首

七老會詩

渾年七十七

幽亭春盡共為歡
印綬居身是大官
遁跡豈勞登遠岫
垂絲何必坐谿磻
詩聯六韻猶應易
酒飲三杯未覺難
每況襟懷同宴會
共將心事比波瀾
風吹野柳垂羅帶
日照庭花落綺紈
此席不煩鋪錦帳
斯筵堪作畫圖看

韋式

韋式太和中人詩一首

一字至七字詩

以題為韻同王起諸公
送白居易分司東都作

竹

竹臨池似玉裒露靜和煙綠抱節寧改貞心自束渭曲
偏種多王家看不足仙杖正驚龍化美實當隨鳳熟唯
愁吹作別離聲回首駕驂舞陣速

張彤

張彤長慶時人詩一首

奉和白太守揀橘

凌霜遠涉太湖深雙卷朱旗望橘林樹樹籠煙靄帶火
山山照日似懸金行看採掇方盈手暗覺馨香已滿襟

揀選封題皆盡力無人不感近臣心

周元範

周元範句曲人詩一首

和白太守揀貢橘

離離朱實綠叢中似火燒山處處紅影下寒林沈綠水
光搖高樹照晴空銀章自竭人臣力一作分玉液誰知造
化功看取明朝船發後餘香猶尚逐仁風

句

誰云蒿上煙隨雲依碧落

投白公

莫怪西陵風景別鏡

湖花草為先春

賀朱慶餘及第已上並見張為主客圖

繁知一

繁知一秭歸令詩一首

書巫山神女祠

雲溪友議白居易除忠州刺史自峽沿流赴郡時秭歸縣繁知

一聞居易將過巫山先於神女祠粉壁大書此詩居易觀之悵然邀知一至曰歷山劉郎中高錫三年理白帝欲作一詩於此怯而不為罷郡經過悉去詩板千餘首但留沈佺期王無兢皇甫冉李端四章而已此四章古今絕唱人造次不合為之與知一同濟卒不賦詩

忠州刺史今才子行到巫山必有詩為報高唐神女道
速排雲雨候清詞

嚴休復

嚴休復官散騎常侍平盧節度使詩二首

唐昌觀玉藥花折有仙人遊悵然成二絕

劇談錄長

安安業坊唐昌觀有玉藥花每發若瓊林瑤樹
元和中見一女子年可十七八容色婉婉從二
女冠造花所竹立良久折花數枝曰覆有
玉峯之期可以行矣行百許步不復見

終日齋心禱玉宸魂銷目斷未逢真不如滿樹瓊瑤藥

笑對藏花洞裏人

羽車潛下玉龜山
塵世何由覩薜蘿
唯有多情枝上雪
好風吹綴綠雲鬟

盧拱

盧拱祕書郎終申州刺史與白居易同時詩二首

江亭寓目

江郭帶林巒
津亭倚檻看
水風蒲葉戰
沙雨鷺鷥寒
晚木初凋柳
秋叢欲敗蘭
哀猿自相叫
鄉淚好無端

中元日觀法事

四孟逢秋序三元得氣中雲迎碧落步章奏玉皇宮壇
滴槐花露香飄栢子風羽衣凌縹緲瑤轂輾虛空久慕
餐霞客常悲習蓼蟲青囊如可授從此訪鴻蒙

句

地甃如拳石溪橫似葉舟

駱浚春日
見語林

李諒

李諒字復言三宰劇縣再為郡牧終京兆尹詩一首

蘇州元日郡齋感懷寄越州元相公杭州白舍

人

時長慶四年也

稱慶還鄉郡吏歸端憂明發儼朝衣首開三百六旬日

一作歷

新知四十九年非當官補拙猶勤慮游宦量才已

息機舉族共資隨月俸一身惟憶故山薇舊交邂逅封
疆近老牧蕭條宴賞稀書札每來同笑語篇章時到借
光輝絲綸暫厭分符竹舟楫初登擁羽旗未知今日情
何似應與幽人事有違

劉猛

劉猛梁州進士與元稹同時詩二首

月生

月生十五前日望光彩圓月滿十五後日畏光彩瘦不見
夜花色一尊成暗酒匣中苔背銅光短不照一作遍空
不惜補明月慚無此良工

苦雨

自念數年間兩手中藏鉤於心且無恨他日為我羞古

老傳童歌連滛亦兵象夜夢戈甲鳴苦不願年長

曉

朝梳一把白夜淚千滴雨可恥垂拱時老作在家女

萬彤雲

萬彤雲為白居易所賞詩一首

獻盧尚書

雲溪友議云彤雲遊梓州謁盧尚書
弘宣為閹人艱阻為詩以獻公怒閹

者而禮
萬生焉

荷衣拭淚幾回穿欲謁朱門抵上天不是尚書輕下客

山家無物與王權

盧貞

盧貞字子蒙官河南尹開成中為大理卿終福建觀察使詩二首

和白尚書賦永豐柳

有序

永豐坊西南角有垂柳一株柔條極茂白尚書曾賦詩傳入樂府遍流京都近有詔旨取兩枝植於禁苑乃知一顧增十倍之價非虛言也因此偶成

絕句非敢繼和前篇

一樹依依在永豐
兩枝飛去杳無蹤
玉皇曾採人間曲
應逐歌聲入九重

和劉夢得歲夜懷友

文翰走天下
琴尊臥洛陽
貞元朝士盡
新歲一悲涼
名早緣才大
官遲為壽長
時來知病已
莫歎步趨妨

御定全唐詩卷四百六十三

欽定四庫全書

御定全唐詩卷四百六十四

王起

王起字舉之揚州人宰相播之弟貞元十四年進士第
又登制策直言極諫科累官尚書左僕射終山南西道
節度使起書無不讀一經目弗忘三典貢舉皆得人集
一百二十卷今存詩六首

和李校書雨中自秘省見訪知早入朝便入集

賢不遇詩有序

起頃任集賢校書及升柏臺又與祕閣相對今直
書殿有張學士嘗忝同幕而與祕書稍遠故瞻望
之詞多

台庭才子來款扉典校初從天祿歸已慚陋巷迴玉趾
仍聞細雨霑綵衣詰朝始趨鳳闕去此日遂愁雞黍違
憶昨謬官在烏府喜君對門討魚魯直廬相望夜更開
高閣遙臨月時吐昔聞三入承明廬今來重入中

一作
今日

重來

秘書校文復忝丞相屬博物更與張侯居新冠峨
峨不變鐵舊泉脉脉猶在渠忽枉情人吐芳訊臨風不
羨潘錦舒憶見青天霞未卷吟翫瑤華不知晚自憐豈
是風引舟如何漸與蓬山遠

貢舉人謁先師聞雅樂

藹藹觀光士來同鵠鷺羣鞠躬遺像在稽首雅歌聞度
曲飄清漢餘音遏曉雲兩楹淒已合九仞杳難分斷續
同清吹洪纖入紫氛長言聽已罷千載仰斯文

濁水求珠

行潦沈明月光輝也不浮識珍能洞鑒精寶一作意此來

求幾被泥沙雜常隨混濁流潤川終自媚照乘且何由

的皦終難掩晶熒頗見收蛇行無脰至飲德已聞酬

和周侍郎見寄

會昌三年起三典舉場周侍郎
墀時刺華州以詩賀之起因答

和門生亦
皆有和

貢院離來二十霜誰知更忝主文場楊葉縱能穿舊的
桂枝何必發新香九重每憶同仙禁六義初吟得夜光

莫道相知不相見蓮峰之下欲徵黃

贈毛仙翁

冰霜肌骨稱童年羽駕何由到俗間
丹竈化金留秘訣仙宮嗽玉叩玄關
壺中世界青天近洞裏烟霞白日閒
若許隨師去塵網願陪鸞鶴向三山

賦花并序

樂天分司東都起與朝賢悉會興化亭
送別酒酣各賦一字至七字詩以題為韻

花點綴分葩露初裊月未斜一枝曲水千樹山家戲蝶
未成夢嬌鶯語更誇既見東園成徑何殊西子同車漸
覺風飄輕似雪能令醉者亂如麻

王損之

王損之貞元十四年進士第詩一首

賦得濁水求珠

積水非澄徹明珠不易求依稀沉極浦想像在中流
目思清淺褰裳恨暗投徒看川色媚空愛夜光浮月入

疑龍吐星歸似蚌游終希識真者採掇冀冥搜

王炎

王炎宰相播之弟鐸之父登貞元進士第累官至太常博士詩一首

賦得行不由徑

邪徑超時捷端心惡此名長衢貴高步大路自規行且

慮

一作避

縈紆僻將求

一作還多

坦蕩情詎同流俗好方保立

身心

一作

貞遠跡如違險修仁在履平始知夫子道從此

得堅誠

封孟紳

一作孟對
又作孟封

封孟紳貞元十五年進士第一人官終太常卿詩一首

賦得行不由徑

一作蕭
昕詩

欲速意

一作
竟

何成康莊欲

一作
亦

砥平天衢皆利往吾道

泰一作
本

方行不復由萊

一作
荒

徑無由見

一作
因訪

蔣生三條

遵廣達

一作
道

九軌尚安貞紫陌悠悠去芳塵步步清澹

臺千載後公正

一作
道

有遺名

邵楚萇

邵楚萇字待倫閩縣人貞元十五年進士第官校書郎
詩一首

題馬侍中燧木香亭

春日遲遲木香閣窈窕佳人褰繡幕淋漓玉露滴紫蕤
綿蠻黃鳥窺朱萼橫漢碧雲歌處斷滿地花鈿舞時落
樹影參差斜入簷風動玲瓏水晶箔

鄭俞

鄭俞貞元十六年登進士第為長水縣令詩一首

賦得玉水記方流

積水綦文動因知玉產幽如天涵素色侔地引方流潛
潤滋雲起榮華射浪浮魚龍泉不夜草木岼無秋璧沼
寧堪比瑤池詎可儔若非懸坐測誰復寄冥搜

吳丹

吳丹字真存吳人貞元十六年登第歷官至鎮州宣慰
副使尚書郎饒州刺史詩一首

賦得玉水記方流

玉泉何處記四折水紋浮潤下寧踰矩居方在上流映
空虛漾漾涵白淨悠悠影碎疑衝斗光清耐觸掩一作舟

珪璋分辨狀沙礫共懷柔

一作愁

願赴朝宗日

一作願獻朝賓海

縈迴入御溝

王鑑

王鑑貞元十六年登進士第詩一首

賦得玉水記方流

玉潤在中洲光臨碕岬幽氤氲冥瑞影演漾度方流乍
似輕漣合還疑駭浪收黃緣知有異洞徹信無儔比德
稱殊賞含輝處至柔沈淪如見念况乃屬時休

陳昌言

陳昌言貞元十六年進士詩二首

賦得玉水記方流

明媚如懷玉奇姿自託幽白虹深不見綠水折空流方
珏清沙遍縱橫氣色浮類圭才有角寫月讓成鉤久處

沈潛貴希當特達收滔滔在何許揭厲願從游

白日麗江臯

一作範
落詩

遲景臨遙水晴空似不高清明開曉鏡昭晰辨秋毫鬱鬱長隄土離離淺渚毛煙銷占一候風靜擁千艘獨嬉青春柳宜看白鷺濤何年謝公賞遺韻在江臯

杜元穎

杜元穎杜陵人如晦五世孫貞元十六年登第又擢宏詞累官司勳負外穆宗時拜中書舍人不閱歲至宰相

再眷出為劔南西川節度使太和中貶循州司馬有五
題詩一卷今存一首

賦得玉水記方流

重泉生美玉積水異常流始玩清堪賞因知寶可求斗
回虹氣見磬折紫光浮中矩皆明德同方叶至柔月華
偏共映風暖佇將遊遇鑒終無暗逢時願見收一作異寶雖無

脛逢時
顧俯收

胡直鈞

胡直鈞登貞元十九年進士第詩一首

太常觀閱驃國新樂

異音來驃國初被奉常人纔可宮商辨殊驚節奏新轉
規迴繡面曲折度文身舒散隨鸞吹喧呼雜鳥春襟袵
懷舊識絲竹變恆陳何事留中夏長令表化淳

俞簡

俞簡貞元進士詩一首

行不由徑

古人心有尚乃是孔門生為計安貧樂當從大道行詎
應流遠迹方欲料前程捷徑雖云易長衢豈不平後來
無枉路先達擅前名一示遵途意微衷益自精

楊嗣復

楊嗣復字繼之於陵子也貞元中擢第初署幕府進右
拾遺累遷中書舍人牛僧孺李宗閔引之由戶部侍郎
擢尚書右丞太和中宗閔罷相嗣復出為劍南東川節
度使宗閔復知政事入為戶部侍郎俄拜同中書門下

平章事武宗立貶潮州刺史宣宗大中初以吏部尚書
召卒謚孝穆詩五首

丁巳歲八月祭武侯祠堂因題臨淮公舊碑

齋莊修祀事旌旆出郊闌雜草軒墀狹塗牆赭堊新謀

猷期

一作開

作聖風俗奉為神酌酒成均澤持兵列偶人非

才膺寵任異代揖芳塵况是平津客碑前淚滿巾

儀鳳

八方該帝澤威鳳忽來賓向日朱光動迎風翠羽新低

昂多異趣飲啄迴無鄰郊藪今翔集河圖意等倫聞韶
知鼓舞偶聖願逡巡比屋初同俗垂恩擊壤人

贈毛仙翁

天上玉郎騎白鶴肘後金壺盛妙藥暫遊下界傲五侯
重看當時舊城郭羽衣茸茸鞋似雪雲上雙童持絳節
王母親縫紫錦囊令向懷中藏秘訣令威子晉皆儔侶
東嶽同尋太真女搜竒綴韻和陽春文章不是人間語
藥成自固黃金骨天地齊兮身不沒日月宮中便是家

下視崑崙何突兀
童姿玉貌誰方比
玄髮綠髯光彌彌
滿朝將相門弟子
隨師盡願拋塵滓
九轉琅玕必有餘
願乞刀圭救生死

題李處士山居

卧龍決起為時君
寂寞匡廬惟白雲
今日仲容修故業
草堂焉敢更移文

謝寄新茶

嗣復作相後止貶觀察郡守此稱司馬疑非嗣復詩

石上生芽二月中
蒙山顧渚莫爭雄
封題寄與楊司馬

應為前銜是相公

御定全唐詩卷四百六十四

欽定四庫全書

御定全唐詩卷四百六十五

楊衡

楊衡字仲師吳興人初與符載崔羣宋濟隱廬山號山中四友後登第官至大理評事詩一卷

廬十五竹亭送姪偁歸山

落葉寒擁壁清霜夜露石正是憶山時復送歸山客殷勤一尊酒曉月當窗白

旅次江亭

扣舷不能寐，皓露清衣襟。
彌傷孤舟夜，遠結萬里心。
幽興惜瑤草，素懷寄鳴琴。
三奏月初上，寂寥寒江深。

賦得夜雨滴空階送魏秀才

委簷方滴滴，霑紅復洒綠。
醉聽作勝隴，愁聞多斷續。
始兼泉一作松響細，稍雜更聲促。
百慮自縈心，況有人如玉。

征人一作思歸

西風屢鳴雁，東郊未升日。
繁煙幕幕昏，暗騎蕭蕭出。
望

雲愁玉塞眠月想蕙質借問露霑衣何如香滿室

遊陸先生故巖居

獨壑臨萬

一作高

嶂蒼苔絕行跡仰窺猿挂樹

一作松

俯對

鶴巢石上有一巖屋相傳靈人宅深林無陽暉幽水轉

鮮碧拾薪遇遺鼎探穴得古籍結念候

一作候

雲興燒香

坐終夕

題玄和師仙藥室

山邊蕭寂

一作寂

室石掩浮雲扃遶室微有路松煙深冥

冥入松汲寒水對鷲問仙經石几香未盡水花風欲零
何年去華表幾度窮蒼冥却顧宦遊子眇如霜中螢

宿陸氏齋賦得殘燈詩

殷勤照永夜屬思未成眠餘暉含薄霧落燼迸空筵誰
比秦樓曉緘愁別幌前

夷陵郡內叙別

禮娶嗣明德同牢夙所欽况蒙生死契豈顧蓬蒿心雁
幣任野薄恩愛緣義深同聲若鼓瑟合韻似鳴琴將近

空未立就翫意難任皎月託言誓滄波信浮沈荆臺理
晨轍巫渚疑宵襟憫憫百慮起回回萬恨深候更促徒
侶先曉徹夜禽燈彩疑寒風蟬思噪密林留念同心帶
贈遠芙蓉簪撫懷極投漆感物重黃金分鸞豈遐阻別
劍念相尋儻甘蓬戶賤願俟故山岑

將之荊州南與張伯剛馬惣鍾陵夜別

荆臺別路長密緒分離狀莫訴杯來促更籌屢已倡燭
花侵霧暗瑟調寒風亮誰一作詎念曉帆開默睇一作點淚一作參

差浪

經端溪峽中

陰岸東流水上有微風生
素羽漾翠澗碧苔數丹英
重林宿雨晦遠岫孤霞明
飛猱相攀牽白雲亂縱橫
有客泝輕櫂閱勝匪羈程
逍遙一息間糞土五侯榮
塞茗庶蠲熱漱泉聊析醒
禮樂志秦尊
柘漿析朝醒寄言絲竹者詎識松風聲

南海苦雨寄贈王四侍御

炎風雜海氣苦雨每成霖塗泥親杖屨苔蘚漬衣襟念
近劇懷遠涉淺定知深暗溝夜滴滴荒庭書靈靈折簡
展離曠理逕俟招尋處陰誠多慘况乃觸隅禽

秋夜閒居即事寄廬山鄭負外蜀郡符處士

憂思繁未整良辰會無由引領逢佳音星紀屢以周蓬
閨絕華耀况乃處窮愁墜葉寒擁砌燈火一作光夜悠悠

開琴弄清弦窺月俯澄流冉冉鴻雁度蕭蕭帷箔秋悵
懷石門詠緬慕碧雞遊髣髴蒙顏色崇蘭隱芳洲

寄贈田倉曹灣

芳蘭媚庭除灼灼紅英舒身為陋巷客門有絳轅車朝

覽夷胡

一作吳

傳暮習潁陽書貯雲高羽翼待賈蘊璫璵

纓弁雖云阻音塵豈復疎若因風雨晦應念寂寥居

詠春色

靄靄復濛濛非

一作霏

霧滿晴空密添宮柳翠暗泄路

一作

露

桃紅縈絲光乍失緣隙影繞通夕迷鴛枕上朝漫綺

弦中促駟馳香陌勞鶯轉豔叢可憐腸斷望併在洛城

東

送春

三月三十日春歸日復暮惆悵問春風明朝應不住送
春曲江上眷眷東西顧但見撲水花紛紛不知數人生
似行客兩足無停步日日進前程前程幾多路兵刃與
水火盡可違之去惟有老到來人間無避處感時良未
已獨倚池南樹今日送春心心如別親故

遊峽山寺

結構天南畔勝絕固難儔幸蒙時所漏遂得恣閒遊
路石陰松蓋蓋藤維鶴舟雨霽花木潤風和景氣柔寶殿
敞丹扉靈幡垂絳旒照曜芙蓉壺金人居上頭翔禽拂
危刹落日避層樓端溪瀰漫駛曲澗潺湲流高居何重
省登覽自夷猶煙霞無隱態巖洞詎遺幽奔駟非久耀
馳波肯暫留會從香火緣滅跡此山丘

宿陟岵寺雲律師院

像宇鬱參差寶林疎復密中有彌天子燃燈坐虛室心

證紅蓮喻跡羈青眼律玉爐揚翠煙金經開縹帙肆陳
堅固學破我夢幻質碧水灑塵纓涼扇當夏日宿禽詎
相保迸火煙欲失願迴戚促勞趨隅事休逸

秋夜桂州宴送鄭十九侍御

秋至觸物愁況當離別筵短歌銷夜燭繁緒遍高弦桂
水舟始泛蘭堂搦詎懸一盃勾一作勿離阻三載奉周旋
鴉噪更漏颯露濡風景鮮斯湏不共此且為更留連

九日陪樊尚書龍山宴集

孟嘉從宴地千乘復登臨緣危陟高步憑曠寫幽襟黃
花翫初馥翠物喜盈斟雲雜組繡色樂和山水音旆搖
秋吹急筵卷夕光沈都人瞻騎火猶知隔寺深

江陵送客歸河北

遠客歸故里臨路結裴回山長水復濶無因重此來聊
將歌一曲送子手中盃

送鄭丞之羅浮中習業

百年泛飄忽萬事繫衰榮高鴻脫矰繳達士去簪纓始

從天目遊復作羅浮行雲卧石林密月窺花洞明全形
在氣和習默憑境清夙秘絳囊訣屢投金簡名鐘管促
離觴煙霞隨去程何當真府內重得款平生

送王秀才往安南

君為蹈海客客路誰諳悉鯨度乍疑山鷄鳴先見日所
嗟迴擢晚倍結離情密無貪合浦珠念守江陵橘

送公孫器自桂林歸蜀

桂林淺復碧潺湲半露石將乘觸物舟暫駐飛空錫蜀

鄉異青眼蓬戶高朱戟風度香難尋雲飄詎留跡舊戶
閒花草馴鴿傍簷隙揮手共忘懷日墮千山夕

贈羅浮易鍊師

海上多仙嶠靈人信長生榮衛冰雪姿嚙嚼日月精點
書絳符遍晦步斗文成翠髮披肩長金蓋凌風輕曉籟
息塵響天雞一作鹿叱幽聲碧樹來戶陰丹霞照窗明焚
香叩虛寂稽首迴太清鸞鷟振羽儀飛翻拂旆旌左挹
玉泉液右搴雲芝英念得參龍駕攀天度赤城

登紫霄峰贈黃仙師

紫霄不可陟，靈峰信穹崇。
下有瓊樹枝，上有翠髮翁。
雞鳴秋漢側，日出紅霞中。
璨璨真仙子，執旄為侍童。
焚香

杳忘言，默念合

一作思含

太空世華徒，熠耀虛室自朦朧。
雲

飛瓊瑤圃，龜息芝蘭藂。
玉籙掩不開，天窗微微風。
茲焉悟佳旨，塵境亦幽通。
浩渺臨廣津，永用挹無窮。

烏啼曲

可憐楊葉復楊花，雪淨煙深碧玉家。
烏栖不定枝條弱，

城頭夜半聲啞啞浮萍流蕩門前水任買芙蓉莫浣紗

白紵歌

一作詞

二首

玉纓翠佩雜輕羅香汗微漬朱顏醺為君起唱白紵歌

清聲裊雲繁思

一作思繁

多凝竒哀瑟

一作琴

時相和金壺半

傾芳夜促梁塵霏霏暗紅燭令君安坐聽終曲墜葉飄

花難再復

躡珠履步瓊筵輕身起舞紅燭前芳姿艷態妖且妍迴

眸轉袖暗催弦涼風蕭蕭漏

一作流

水急月華泛艷紅蓮

濕牽裙攬帶翻成泣

長門怨

絲聲繁兮管聲急
珠簾不捲風吹入
萬遍凝愁枕上聽
千迴候命花間立
望望昭陽信不來
迴眸獨掩紅巾泣

寄徹公

北風吹霜霜月明
荷葉枯盡越水清
別來幾度龍宮宿
雪山童子應相逐

哭李象

白雞黃犬不將去寂寞空餘墓時路草死花開年復一

作一

幾年後人知是何人墓憶君思君獨不眠夜寒月照青

楓樹

宿雲溪觀賦得秋燈引送客

雲房寄宿秋夜客一燈熒熒照虛壁蟲聲呼客客未眠
幾人語話清景側不可離別愁紛多秋燈秋燈奈別何

採蓮曲

凝鮮霧渚夕陽豔綠波風魚遊乍散藻露重稍歇紅楚

客傷暮節吳娃泣敗蘂促令芳本固寧望雪霜中

他鄉七夕

一本無他鄉二字

漢渚

一作浦

常多別山

一作星

橋忽重遊向雲迎翠輦當月

拜珠旒寢幌凝宵態妝奩閉曉

一作晚

愁不堪鳴杼日空

對白榆秋

春日偶題

何處春先到橋東水北亭凍花開未得冷酒酌難醒就

日移輕榻遮風展小屏更無

一作不勞

人勸飲

一作醉

鶯語漸

叮嚀

題山寺

千峯白露後雲

一作雪

壁挂殘燈曙色海邊日

一作月

經聲

松下僧意閒門不閉年去水空澄稽首如何問森羅盡

一乘

廣州石門寺重送李尚赴朝時兼宗正卿

象闕趨雲陞龍宮憇石門清鏡猶啓路黃髮重攀轅藻

變朝天服珠懷委地言那令蓬蒿客茲席未

一作咏

離尊

送孔周之南海謁王尚書

泛櫂若

送一作

流萍桂寒山更青望雲生碧落看日下滄

溟潮盡收珠母沙閒拾翠翎自趨龍戟下再為誦芳馨

冬夜舉公房送崔秀才歸南陽

聞君動征櫂犯夜故來尋強置一尊酒重款百年心燈
白霜氣冷室虛松韻深南陽三顧地幸偶價千金

送陳房謁撫州周使君

匡山一畝宮尚有桂蘭叢鑿壁年雖異穿楊志幸同貌

羸緣塞苦道蹇為囊空去謁臨川守因憐鶴在籠

山齋獨宿贈晏上人

幢石

一作

幢雲樹秋黃葉下山頭蟲響夜難空

一作

度夢閒

神不遊窗燈寒几盡

一作

簾雨曉階愁何以禪棲客灰

心在沃州

桂州與陳羽念別

慘戚損志抱因君時解顏重歎今夕會復在幾夕間碧
桂水連海蒼梧雲滿山茫茫從此去何路入秦關

經趙處士居

雲居避世客髮白習儒經有地水空綠無人山自青
廢梁悲逝水臥木思荒庭向夕霏煙斂徒看處士星

病中赴袁州次香館

病興慙上館繚繞向山隅荒葛漫歌壁幽禽啄朽株
力微怯升降意欲結跼蹐誰能挹香水一為濯煩紆

送人流雷州

逐客指天涯人間此路賒地圖經大庾水驛過長沙
臘

月雷州雨秋風桂嶺花不知荒徼外何處有人家

送一作贈徹公

白首年空度幽居俗豈知敗蕉依晚日孤鶴立秋墀一作

池久客何由造禪門不可窺會同塵外友齊沐奉威儀

贈廬山道士

寂寥高室古松寒松下仙人字委鸞頭垂白髮朝鳴磬
手把青芝夜遶壇物像自隨塵外滅真源長向性中看
悠悠萬古皆如此秋比松枝春比蘭

賦得直如朱絲絃

寂寞瑤琴上深知直者情
幸傳朱鷺曲那止素絲名
瑞草人空仰王言世久行
大方聞正位樂府動清聲
文武音初合宮商調屢更誰能向
機杼終日泣無成

早春即事

眼重朝眠足頭輕宿醉醒
陽光滿前戶雪水半中庭
候物一作變隨天氣春生逐地形
北簷梅晚白東嶺柳先青
葱蘢抽羊角松巢墮鶴翎
老來詩更拙吟罷少人聽

題花樹

都無看花意偶到樹邊來可憐枝上色一一為愁開

宿吉祥寺寄廬山隱者

風一作鳳鳴雲外鐘鶴宿千年松相思杳不見月出山重

重

一作孤月
出山重

邊思

蘇武節旄盡李陵音信稀梅一作花當隴上發人向隴頭

歸

夜半步次古城

茫茫死復生

一作行復坐

惟有古時城夜半無鳥雀花枝當

月明

春夢

空庭日照花如錦紅妝美人當晝寢傍人不知夢中事
唯見玉釵時墜枕

宿青牛谷

一本此下有梁鍊師隱居五字

隨雲步入青牛谷青牛道士留我宿可憐夜久月明中

唯有壇邊一枝竹

槿

一作戎
呈詩

自用金錢買槿栽二年方始一花開
憐紅未許家一作佳
人見胡蝶爭知早到來

九日

黃菊一作花紫菊傍籬落
摘菊泛酒愛芳新
不堪今日望

鄉意強插茱萸隨衆人

仙女詞

玉京

一作

初侍紫皇君金縷鴛鴦滿絳裙仙宮一閑無

消息遙結芳心向碧雲

句

賢人處霄漢荒澤自耕耘隴首降時雨雷聲出夏雲

答崔錢二補闕

見詩式

一一鶴聲飛上天

見紀事

御定全唐詩卷四百六十五

欽定四庫全書

御定全唐詩卷四百六十六

牛僧孺

牛僧孺字思黯隴西人貞元中擢進士第歷相穆敬兩朝封奇章郡公後出為武昌節度使文宗朝徵入再相夙與李德裕相惡會昌中貶循州長史大中初還為太子少師卒集五卷今存詩四首

享太廟樂章

湜湜頤頤融昭德輝不紐不舒貫成九圍武烈文經敷施
當宜纂堯付啟億萬熙熙

樂天夢得有歲夜詩聊以奉和

惜歲歲今盡少年應不知淒涼數流輩歡喜見孫兒暗
減一身力潛添滿鬢絲莫愁花笑老花自幾多時

李蘇州遺太湖石竒狀絕倫因題二十韻奉呈

夢得樂天

胚渾何時結嵌空此日成掀蹲龍虎鬪扶怪鬼神驚帶

雨新水靜輕敲碎玉鳴攬義鋒刃簇縷絡釣絲紫近水
搖竒冷依松助澹清通身鱗甲隱透穴洞天明醜凸隆
胡隼深凹刻兕觥雷風疑欲變陰黑訝將行噤痒微寒
早輪囷數片橫地祇愁墊壓鰲足困支撐珍重姑蘇守
相憐嬾慢情為探湖裏一作底物不怕浪中鯨利涉餘千
里山河僅百程池塘初展見金玉自凡輕側眩魂猶悚
周觀意漸平似逢三益友如對十年兄旺興添魔力消
煩破宿醒嬾人當綺皓視秩即公卿南朝有司空石蓋以定石之流品

念此園林寶還須別識精詩仙有劉白為汝數逢迎

席上贈劉夢得

粉署為郎四十春今來名輩更無人休論世上升沉事
且鬪樽前見在身珠玉會應成咳唾山川猶覺露精神
莫嫌恃酒輕言語曾把文章謁後塵

句

但愁封寄去魔物或驚禪

贈白樂天箏

惟羨東都白居易士

年年香積問禪師

贈白下同

不是道公狂不得恨公逢我

不教狂 地瘦草叢短 求人氣色沮憑酒意乃伸

葉季良

葉季良登貞元進士第詩三首

賦得月照冰池

霽夕雲初斂棲娥月未虧圓光生碧海素色滿瑤池天
迴輪空見波凝影詎窺浮霜玉比彩照像鏡同規皎潔
寒偏淨裴回夜轉宜誰憐幽境在長與賞心隨

賦得琢玉成器

片玉寄幽石紛綸當代名荆人獻始遇良匠琢初成冰
映寒光動虹開晚一作曉色明雅容看更澈餘響扣彌清
自與瓊瑤比方隨掌握榮因知君有用高價佇連城

省試吳宮教美人戰

強吳矜霸略講武在深宮畫出嬌娥技先觀上將風揮
戈羅袖卷擐甲汗妝紅掩笑分旗下含羞入隊中鼓停
行未止刑舉令纔崇自可威隣國何勞逞戰功

湛賁

湛貴宋長史茂之十二世孫本家毘陵後為宜春人貞
元中登第嘗以江陰縣主簿權知無錫縣事後為毘陵
守詩三首

題歷山司徒右長史祖宅

隳官長史籍高步歷山椒麗句傳黃絹香名播宋朝分
能知止足跡貴出塵囂松竹心長固池臺興自饒龍宮
欣訪舊鶯谷忝遷喬從事叨承乏銅章媿在腰

伏覽呂侍郎渭

丘員外丹舊題十三代祖歷山

草堂詩因書記事

名遂貴知已道勝方晦跡高居葺蓮宮遺文煥石壁桑
田代已變池草春猶碧識曲遇周郎知音荷宗伯調逸
南平兆風清建安跡祖德今發揚還同書史冊

別慧山書堂

捲簾曉望雲平檻下榻宵吟月半窗病守未能依結社
更施何術去為邦

薛存誠

薛存誠字資明河東人登貞元進士第元和末官至御史中丞詩十二首

暮春自南臺丞再除給事中

仍是本廳几榻杖履宛然如舊

再入青瑣闥忝官誠自非拂塵驚物在開戶似一作侍僧

歸積草漸無逕殘花猶灑衣禁垣偏日近行坐是恩輝

御製段太尉碑

一作薛有誠詩

葬儀從儉禮刊石荷堯君露跡垂繁字

一作藻

天哀灑麗

文詔深榮嗣子海變記孤墳寶思皆涵象皇心永念勲

雅詞黃絹妙渥澤紫泥分青史應同久芳名萬古聞

御題國子監門

宸翰符玄造榮題國子門筆鋒迴日月字勢動乾坤
簷下雲光絕梁間鵲影翻張英聖莫擬索靖妙難言
為著盤龍跡能彰舞鳳蹲更隨垂露像常以沐皇恩

御箭連中雙兔

宸遊經上苑羽獵向閒田狡兔初迷窟纖驪詎著鞭
三驅仍百步一發遂雙連影射含霜草魂消向月弦
驪聲

動寒木喜氣滿晴天那似陳王意空隨樂府篇

太學創置石經

聖唐復古制德義功無替奧旨悅詩書遺文分篆隸銀
鉤互交映石壁靡塵翳永與乾坤期不逐日月逝儒林
道益廣學者心彌銳從此理化成恩光遍遐裔

觀南郊回仗

傳警千門寂南郊綵仗回但驚龍再見誰識日雙開德
澤施雲雨恩光變燼灰閱兵貔虎振聽樂鳳皇來候刻

移宸輦遵時集觀臺多慚遠臣賤不得禮容陪

聞擊壤

堯年聽野老擊壤復何云自謂歡由已寧知德在君氣
平閒易暢聲賀作難分耕鑿方隨日恩威比望雲簞桴
均下調和木等南薰無落於吾事誰將帝已聞

膏澤多豐年

帝德方多澤莓莓井逕同八方甘雨布四遠報年豐殿
庾千廂在幽流萬壑通候時勤稼穡擊壤樂農功畎畝

人無情田廬歲不空何須憂伏臘千載賀堯風

東都父老望幸

鑾輿秦地久羽衛洛陽空彼土雖憑固茲川乃得中
龍顏覲白日鶴髮仰清風望幸誠逾邈懷來意不窮
昔因封泰岳今佇躡維嵩天地心無異神祇理亦同
翠華翔渭北玉檢候關東衆願其難阻明君早勒功

嵩山望幸

峻極位何崇方知造化功降靈逢聖主望幸表維嵩
隱

映連青壁嵯峨向碧空
象車因叶瑞龍駕願升中
萬歲聲長在千巖氣轉雄
東都歌盛事西笑佇皇風

華清宮望幸

驪岫接新豐
峩峩駕碧空
鑿山開秘殿
隱霧蔽仙宮
絳闕猶棲鳳
雕梁尚帶虹
溫泉曾浴日
華館舊迎風
肅穆瞻雲輦
深沉閉綺櫳
東郊望幸處
瑞氣靄濛濛

謁見日將至雙闕

曉色臨雙闕
微臣禮位陪
遠驚龍鳳覩
誰識冕旒開
謁

謁千年盛顯顯萬國來天文標日月時令布雲雷迴出
黃金殿全分白玉臺雕蟲竟何取瞻戀不知迴

裴次元

裴次元貞元中第進士元和中為福州刺史河南尹終
江西觀察使詩三首

南至日隔仗望含元殿爐香

一作煙

冕旒初負宸丹服盡朝天暘谷初移一作移時日金爐漸起

一作出御煙芬馨流遠近散漫入貂蟬霜仗凝逾白朱欄映

轉鮮始看浮闕在稍見逐風遷為沐皇家慶來瞻羽衛
前

律中應鐘

一作裴
元詩

律窮方數寸室暗在三重伶管灰先動秦正節已逢商
聲辭玉笛羽調入金鐘密葉翻霜彩輕冰斂水容望鴻
南去絕迎氣北來濃願託無凋性寒林自比松

賦得亞父碎玉斗

雄謀竟不決寶玉將何愛
脩爾霜刃揮颯然春冰碎飛

光動旗幟散響驚環珮霜濃繡帳前星流錦筵內圖王
業已失為虜言空悔獨有青史中英風冠千載

句

積高依郡城迴拔凌霄漢

題望京山見閩志

李宣遠

李宣遠貞元進士登第詩二首

并州路

一作楊遠詩題云塞下作

秋日并州路黃榆落故關

一作照間

孤城吹角罷數騎射鵬

還帳幕遙臨水牛羊自下山征人正垂淚烽火起雲間

近無西耗

一作李敬方詩

遠戎兵壓境遷客淚橫襟烽堠驚秦塞囚居困越吟自
憐牛馬走未識犬羊心一月無消息西看日又沈

李君何

李君何貞元中進士第詩一首

曲江亭望慈恩寺杏園花發

春晴凭水軒仙杏發南園開藥風初曉浮香景欲暄光

華臨御陌色相對空閒野雪遙添淨山煙近借繁地門
分鹿苑景勝類桃源況值新晴日芳枝度彩鴛

周弘亮

周弘亮登貞元進士第詩三首

除夜書情

何處風塵歲歲雲陽古驛前三冬不再稔曉日又明年春
入江南柳寒歸塞北天還傷知候客花景對韋編

曲江亭望慈恩寺古園花發

江亭閒望處遠近見秦源古寺遲春景新花發杏園萼
中輕藥密枝上素姿繁拂雨雲初起含風雪欲翻容輝
明十地香氣遍千門願莫隨桃李芳菲不為言

故鄉除夜

三百六十日云終故鄉還與異鄉同非唯律變情堪恨
抑亦才疎命未通何處夜歌銷臘酒誰家高燭候春風
詩成始欲吟將看早是去年牽課中

陳翥

陳翥貞元進士第詩一首

曲江亭望慈恩寺杏園花發

曲江晴望好，近接梵王家。
十畝開金地，千林發杏花。
映雲猶誤雪，煦日欲成霞。
紫陌傳香遠，紅泉落影斜。
園中春尚早，亭上路非賒。
芳景堪游處，其如惜物華。

曹著

曹著貞元進士第詩一首

曲江亭望慈恩寺杏園花發

渚亭臨淨域憑望一開軒
晚日分初地東風發杏園
異香飄九陌麗色映千門
照灼瑤華散葳蕤玉露繁
未教游妓折乍聽早鶯喧
誰復爭桃李含芳自不言

王公亮

王公亮登貞元進士第長慶初自司門郎中為商州刺史詩一首

魚上冰

春生寒氣減稍動久潛魚
乍喜東風至來看曲岍初出

冰朱鬣見望日錦鱗舒漸覺流漸近還欣掉尾餘
唼喁情自樂汭沂意寧疎儻得隨鯤化終能上太虛

張仲方

張仲方韶州始興人九齡族孫貞元中擢進士宏詞
厯散騎常侍京兆尹左遷華州刺史入為祕書監集三十
卷今存詩二首

賦得竹箭有筠

東南生綠竹獨美有筠箭枝葉詎曾凋風霜孰云變
偏

宜林表秀多向歲寒見碧色乍蔥蘢清光常舊練皮開
鳳彩出節勁龍文現愛此守堅貞含歌屬時彥

贈毛仙翁

毛仙翁毛仙翁容貌常如二八童幾歲頭梳雲鬢綠無
時面帶桃花紅眼前人世閱滄海肘後藥成辭月宮方
口秀眉編貝齒瞭然灵灵雙瞳子芝椿稟氣本堅強龜
鶴計年應不死四海五山長獨遊矜貧傲富欺王侯靈
通一作靈指下甄璧一作龍虎化瑞氣爐中金玉流定是煙霞

列仙侶暫來塵俗救危苦紫霞妖女瓊華飛秘法虔心
傳付與陰功足陰功成羽駕何年歸上清待我休官了
婚嫁桃源洞裏覓仙兄

句

入門池色靜登閣雨聲來

見三山志

崔玄亮

崔玄毫字晦叔磁州人貞元中與元白同登第憲宗時
為監察御史歷密欽湖三州刺史太和中由諫議大夫

遷散騎常侍終號州刺史有三州倡和集今存詩二首

和白樂天

時以太子賓客分司東都

病餘歸到洛陽頭拭目開看見白侯鳳詔恐君今歲去
龍門欠我舊時遊自到未幾人樽下同歌詠數盞燈前
共獻酬相對憶劉劉在遠寒宵耿耿夢長洲

臨終詩

甃榮甃悴石敲火即空即色眼生花許時為客今歸去
大厯元年是我家

句

共相呼喚醉歸來

徐牧

徐牧貞元進士詩一首

省試臨淵一作川羨魚

清泚濯纓處今來喜一臨
慙無下釣處空有羨魚心
退省時頻改謀身歲屢沈
鬣成川上媚網就水寧深
潁尾臨波裏朱鬚破浪潯
此時儻不漏江上免行吟

王播

王播字明敫其先太原人父恕為揚州倉曹參軍遂家
馬播與弟炎起皆有文名並擢進士長慶初拜相太和
初復專政卒贈太尉詩三首

淮南游故居感舊酬西川李尚書德裕

一本題
作為淮

南節度使遊
故居感舊

昔年獻賦去江渚今日行春到却悲三徑僅存新竹樹
四鄰惟見舊孫兒壁間潛認偷光處川上寧忘結網時

更見橋邊記名姓始知題柱免人嗤

題木蘭院

一作惠照寺

二首

播少孤貧嘗客揚州惠照寺木蘭院隨僧齋餐僧
厭怠乃齋罷而後擊鐘後二紀播自重位出鎮是
邦因訪舊游向之題名皆以碧紗幕其詩播繼以
二絕句

三十年前此院遊木蘭花發院新修如今再到經行處
樹老無花僧白頭

上堂已了各西東
慚愧闍黎飯後鐘
三十年来塵撲面
如一作而今始得碧紗籠

獨孤良弼

獨孤良弼貞元間進士官左司郎中詩一首

上已接清明游宴

上已歡初罷
清明賞又追
閨年侵舊曆
令節併芳時
細一作暮雨鶯飛重
春風酒醞遲
尋花迷白雪
看柳折青絲
淑氣如相待
天和意為誰
吁嗟名未立
空詠宴游詩

沈傳師

沈傳師字子言吳人貞元末登第歷官拾遺翰林學士
中書舍人寶歷中由尚書右丞出為宣歙觀察使復入
為吏部侍郎有才行工楷法詩五首

次潭州酬唐侍御姚員外游道林嶽麓寺題示

承明年老輒自論乞得湘守東南奔為聞楚國富山水

青嶂邈迤僧家園含香珥筆皆眷舊謙抑一作搗自忘臺

省尊不令執簡候亭館直許攜手游山樊忽驚列岫曉

晚一作來逼朔雪洗盡煙嵐昏碧波迴嶼三山轉丹檻繚

郭千艘屯華鑣躑躅絢砂步大旆綵錯輝松門樛枝競

驚龍蛇勢折幹不減風霆痕相重古殿倚嵒腹別引新

徑紫雲根目傷平楚虞帝魂情多思遠聊開樽危弦細

管逐歌飄

一作颺

畫鼓繡靴隨節翻鏘金七言凌老杜入

木八法蟠高軒嗟余潦倒久不利

一作知

忍復感激論元

元

和李德裕觀玉藥花見懷之作

曾對金鑾直同依玉樹陰雪英飛舞近煙葉動搖深素
萼年年密哀容日日侵勞君想華髮近欲不勝簪德裕
元倡
有今來想顏色還似
憶瓊枝之句故云

贈毛仙翁

安期何事出雲煙為把仙方與世傳只向人間稱百歲
誰知洞裏過千年青牛到日迎方朔丹竈開時共稚川
更說桃源更深處異花長占四時天

寄大府兄侍史見雲煙
過眼錄

積雪山陰馬過難殘更深夜鐵衣寒將軍破了單于
陣更把兵書仔細看

蒙泉

見方輿勝覽

京路馬駸駸塵勞日向深蒙泉聊息駕可以洗君心

白行簡

白行簡字知退白居易之弟貞元末第進士累官度支
郎中有兄風嘗從居易謫所天性友愛當時無比集二
十卷今存詩七首

春從何處來

欲識春生處先從木德來
入門潛報柳度嶺暗驚梅透
雪寒光散消冰水鏡開曉
迎郊騎發夜逐斗杓迴淑氣
空中變新聲雨後催偏宜資
律呂應是候陽臺

貢院樓北新栽小松

華省春霜曙樓陰植小松
移根依厚地委質別危峰
北戶知猶遠東堂幸見容
心堅終待鶴枝嫩未成龍
夜影看仍薄朝嵐色漸濃
山苗不可蔭孤直俟秦封

金在鎔

巨索方鎔物洪鑪欲範金紫光看漸發赤氣望逾深
燄熟晴雲變煙浮晝景陰堅剛由我性鼓鑄任君心
踴躍徒標異沈潛自可欽何當得成器待叩向知音

歸馬華山

牧野功成後周王戰馬閑驅馳休伏阜飲馐任依山
逐日朝仍去隨風暮自還永生疑隴坂葉落似榆關
蹀躞仙峰下騰驤渭水灣幸逢時偃武不復鼓鞶間

夫子鼓琴得其人

宣父窮玄奧師襄授素琴稍殊流水引全辨聖人心慕
德聲逾感懷人意自深泠泠傳妙手撼撼振空林促調
清風至操弦白日沈曲終情不盡千古仰知音

李都尉重陽日得蘇屬國書

降虜意何如窮荒九月初三秋異鄉節一紙故人書對
酒情無極開緘思有餘感時空寂寞懷舊幾躊躇鴈盡
平沙迴煙銷大漠虛登臺南望處掩淚對雙魚

在巴南望郡南山呈樂天

時從樂天忠州

臨江一嶂白雲間
紅綠層層錦繡班
不作巴南天外意
何殊昭應望驪山

裴澄

裴澄聞喜人德宗朝登第官至蘇州刺史詩一首

春雲

漠漠復溶溶
乘春任所從
映林初展葉
觸石未成峰
旭日消寒翠
晴煙點淨容
霏微將似滅
深淺又如重
薄彩

臨溪散輕陰帶雨濃空餘負樵者嶺上自相逢

羅立言

羅立言宣州人太和中歷司農少卿李訓引為京兆少尹知府事同謀誅宦官被害詩一首

賦得沽美玉

誰憐被褐士懷玉正求沽成器終期達逢時豈見誣寶
同珠照乘價重劍論都浮彩朝虹滿懸光夜月一作月影孤
幾年淪瓦礫今日出泥塗采斲資良匠無令瑕掩瑜

張燦

張燦貞元元和間進士詩一首

寒食遣懷

繁華泣清露悄悄落衣巾
明日逢寒食春風見故人
病來羞帶楚西去欲迷秦
憔悴此時久一作夜青山歸四鄰

御定全唐詩卷四百六十六

欽定四庫全書

集部

御定全唐詩卷四百六十七至九

詳校官庶吉士臣胡鉦

主事銜臣徐以坤覆勘

總校官知縣臣繆琪

校對官中書臣高 中

謄錄監生臣徐秉敬

欽定四庫全書

御定全唐詩卷四百六十七

牟融

牟融有贈歐陽詹張籍韓翃諸人詩蓋貞元元和間人也詩一卷

春日山亭

醉來重整華陽巾搔首驚看白髮新莫道愁多因病酒只緣命薄不辭貧龍魚失水難為用龜玉蒙塵未見珍

正是聖朝全盛日詎知林下有閒人

寄周韶州

十年學道困窮廬空有長才重老儒功業要當垂永久
利名那得在湏臾山中荆璞誰知玉海底驪龍不見珠
寄語故人休悵快古來賢達事多殊

秋夜醉歸有感而賦

銜盃誰道易更闌沈醉歸來不自歡惆悵後時孤劍冷
寂寥無寐一燈殘竹窗涼雨鳴秋籟江郭清砧擣夜寒

多少客懷消不得臨風搔首浩漫漫

寄范使君

未秋為別已終秋咫尺婁江路阻脩心上惟君知委曲
眼前獨我逐漂流從來姑息難為好到底依棲總是詼
西望家山成浩歎臨風搔首不勝愁

送羅約

雨晴江館柳依依握手那堪此別離獨鶴孤琴隨遠旆
紅亭綠酒惜分岐月明野店聞雞早花暗關城匹馬遲

後夜定知相憶處東風回首不勝悲

題李昭訓山水

卜築藏修地自偏尊前詩酒集羣賢
半岩松暝時藏鶴一枕秋聲夜聽泉
風月謾勞酬逸興漁樵隨處度流年
南州人物依然在山水幽居勝輞川

處厚遊杭作詩寄之

江村搖落暫逢秋況是聞君獨遠遊
浙水風煙思弔古楚鄉人物賦登樓
書沈寒鴈雲邊影夢繞清猿月下愁

念我故人勞碌久不如投老臥滄洲

山中有懷李十二

第七句缺三字
第八句缺一字

林前風景晚蒼蒼林下懷人路杳茫
白髮流年淹舊業碧山茅屋卧斜陽
客邊秋興悲張翰病裏春情笑沈郎
何事登樓幾迴搔首思歸

客中作

異鄉歲晚悵離懷遊子馳驅媿不才
夜夜砧聲催客去年年鴈影帶寒來
半林殘葉迎霜落三徑黃花近節開

幾度無聊倍惆悵臨風搔首獨興哀

山寺律僧畫蘭竹圖

偶來絕頂興無窮獨有山僧筆最工
綠徑日長袁戶在紫荃秋晚謝庭空
離花影度湘江月遺珮香生洛浦風
欲結歲寒盟不去忘機相對畫圖中

送客之杭

西風吹冷透貂裘行色匆匆不暫留
帆帶夕陽投越浦心隨明月到杭州
風清聽漏驚鄉夢燈下聞歌亂別愁

懸想到杭州興地尊前應與話離憂

有感二首

何事離懷入夢頻
貧居寂寞四無鄰
詩因韻險難成律
酒為愁多不顧身
眼底故人驚歲別
尊前華髮逐時新
十年飄泊如萍跡
一度登臨一悵神

搔首臨風獨倚欄
客邊驚覺歲華殘
栖遲未遇常鉤薦
邂逅寧彈貢禹冠
有興不愁詩韻險
無聊只怕酒杯乾
何如日日長如醉
付與詩人一笑看

送沈侯之京

悠悠旌旆出東樓特出仙郎上帝州
劉旻才高能富國蕭何人傑足封侯
關河弱柳垂金縷水驛青帘拂畫樓
欲盡故人尊酒意春風江上暫停舟

寄羽士

別來有路隔仙凡幾度臨風欲去難
樂道無時忘鶴伴談玄何日到星壇
山中勝景常留客林下清風好煉丹
使我浮生塵鞅脫相從應得一盤桓

題趙丈

林間曲徑掩衡茅，遠屋青青翡翠梢。
一枕秋聲鸞舞月，半窓雲影鶴歸巢。
曾聞賈誼陳奇策，肯學揚雄賦解嘲。
我有清風高節在，知君不負歲寒交。

司馬遷墓

落落長才負不羈，中原回首益堪悲。
英雄此日誰能薦，聲價當時衆所推。
一代高風留異國，百年遺跡剩殘碑。
經過詞客空惆悵，落日寒煙賦黍離。

春遊

錦袍日暖耀冰蠶上客陪遊酒半酣笑拂吟鞭邀好興
醉欹烏帽逞雄談樓前弱柳搖金縷林外遙山隔翠嵐
正是太平行樂處春風花下且停驂

水西草堂

第四句缺二字
第七句缺一字

蘿徑蕭然曲業存閒雲流水四無隣身留白屋潛踪跡
門吟學隱淪吟對琴尊江上月笑看花木鏡中春
遺書自有親處何必驅馳擾世塵

送羽衣之京

羽衣縹緲拂塵囂，悵別河梁贈柳條。
閨苑雲深孤鶴迥，蓬萊天近一身遙。
香浮寶輦仙風潤，花落瑤壇絳雨消。
自是長生林下客，也陪鴛鴦入清朝。

題道院壁

山中舊宅四無隣，草淨雲和迥絕塵。
神棗胡麻能飯客，桃花流水蔭通津。
星壇火伏煙霞暝，林壑春香鳥雀馴。
若使凡緣終可脫，也應從此度閒身。

贈歐陽詹

為客囊無季子金，半生踪跡任浮沈。
服勤因念劬勞重，思養徒懷感慨深。
島外斷雲凝遠日，天涯芳草動愁心。
家林千里遙相憶，幾度停車一悵吟。

邵公母

搔首驚聞楚些歌，拂衣歸去淚懸河。
劬勞長想三春恨，思養其如寸草何。
淞水夢懷千里遠，蘇臺愁望白雲多。
傷心獨有黃堂客，幾度臨風詠蓼莪。

客中作

千里雲山戀舊遊
寒窓涼雨夜悠悠
浮亭花竹頻勞夢
別路風煙半是愁
芳草傍人空對酒
流年多病倦登樓
一杯重向樽前醉
莫遣相思累白頭

贈楊處厚

十年學道苦勞神
贏得尊前一病身
天上故人皆是貴
山中明月獨相親
客心淡泊偏宜靜
吾道從容不厭貧
幾度臨風一回首
笑看華髮及時新

重贈張籍

舊日儀容只宛然，笑談不覺度流年。
凡緣未了嗟無子，薄命能孤不怨天。
一醉便同塵外客，百杯疑是酒中仙。
人生隨處堪爲樂，管甚秋香滿鬢邊。

贈殷以道

世路紅塵懶步趨，長年結屋傍巖隅。
獨留鄉井誠非隱，老向山林不自愚。
肯信白圭終在璞，誰憐滄海竟遺珠。
閒來撫景窮吟處，尊酒臨風不自娛。

翁母此

滿頭華髮向人垂長逝音容迥莫追
先壠每懷風木夜畫堂無復綵衣時
停車遙望孤雲影翹首驚看弔鶴悲
獨有賢人崇孝義傷心共詠蓼莪詩

題山莊

蘿屋蕭蕭事事幽臨風搔首遠凝眸
東園松菊存遺業晚景桑榆樂舊遊
吟對清尊江上月笑談華髮鏡中秋
牀頭濁酒時時漉上客相過一任留

沈存尚林亭夜宴

草堂寂寂景偏幽到此令人一縱眸
松菊寒香三徑晚桑榆煙景兩淮秋
近山紅葉堆林屋隔浦青帘拂畫樓
終日忘情能自樂清尊應得遣閒愁

題孫君山亭

長年樂道遠塵氛靜築藏修學隱淪
吟對琴樽庭下月笑看花木檻前春
閒來欲著登山屐醉裏還披漉酒巾
林壑能忘軒冕貴白雲黃鶴好相親

題徐俞山居

青山重叠巧裁攢，引水流泉夜激湍。
嵐鎖巖扉清晝暝，雲歸松壑翠陰寒。
不因李相門前見，曾向袁生畫裏看。
我老不堪詩思杳，幾回吟倚曲欄干。

送范啓東還京

蕭蕭行李上征鞍，滿目離情欲去難。
客裏故人尊酒別，天涯遊子弊裘寒。
官橋楊柳和愁折，驛路梅花帶雪看。
重到京華舊遊地，春風佳麗好盤桓。

樓城叙別

故人為客上神州，傾蓋相逢感昔遊。
屈指年華嗟遠別，對牀風雨話離愁。
清樽不負花前約，白髮驚看鏡裏秋。
此際那堪重分手，綠波芳草暫停舟。

寫意二首

寂寥荒館閉閒門，苔徑陰陰屐少痕。
白髮顛狂塵夢斷，青氈冷落客心存。
高山流水琴三弄，明月清風酒一樽。
醉後曲肱林下卧，此生榮辱不須論。

蕭蕭華髮滿頭生，深遠蓬門倦送迎。
獨喜冥心無外慕，自憐知命不求榮。
閒情欲賦思陶令，卧病何人問馬卿。
林下貧居甘困守，儘教城市不知名。

贈浙西李相公

長庚烈烈獨遙天，盛世應知降謫仙。
月裏昔曾分兔藥，人間今喜得椿年。
文章政事追先達，冠蓋聲華羨昔賢。
尊酒與君稱壽畢，春風入醉綺羅筵。

天台

碧溪流水泛桃花樹繞天台迥不賒洞裏無塵通客境
人間有路入仙家雞鳴犬吠三山近草靜雲和一徑斜
此地不知何處去暫留瓊珮卧煙霞

送陳衡

秋江煙景晚蒼蒼江上離人促去航千里一官嗟獨往
十年雙鬢付三霜雲迷樓曲親庭遠夢遶通山客路長
不必臨風悲冷落古來白首尚為郎

送沈翔

江上西風一擢歸故人此別會應稀清朝盡道無遺逸
當路誰曾訪少微謾有才華嗟未達閒尋鷗鳥暫忘機
臨岐不用空惆悵未必新豐老布衣

過蠡湖

東湖煙水浩漫漫湘浦秋聲入夜寒風外暗香飄落粉
月中清影舞離鸞多情袁尹頻移席有道喬仙獨倚闌
幾度簾簾相對處無邊詩思到吟壇

登環翠樓

山中地僻好藏修寂寂幽居架小樓雲樹四圍當戶暝
煙嵐一帶隔簾浮舉杯對月邀詩興撫景令人豁醉眸
我亦人間肥遁客也將踪跡寄林丘

遊淮雲寺

白雲深鎖沃州山冠蓋登臨衆仰攀松徑風清聞鶴淚
曇花香暝見僧還玄機隱隱應難覺塵事悠悠了不關
興盡凡緣因未晚裴回依舊到人間

遊報本寺

山房寂寂華門開此日相期社友來雅興共尋方外樂
新詩爭羨郢中才茶煙裏裹籠禪榻竹影蕭蕭掃徑苔
醉後不知明月上狂歌直到夜深回

了然塵事不相關錫杖時時獨看山白髮任教雙鬢改
黃金難買一生閒不留活計存囊底贏得詩名滿世間
自笑微軀長碌碌幾時來此學無還

題陳侯竹亭

曾向幽亭一榻分清風滿座絕塵氛丹山鳳泣鉤簾聽

滄海龍吟對酒聞漠漠暝陰籠砌月盈盈寒翠動湘雲
歲寒高節誰能識獨有王猷愛此君

送報本寺分韻得通字

第七句第八句缺

幾度乘閒謁梵宮此郎聲價重江東貴侯知重曾忘勢
閒客頻來也悟空滿地新蔬和雨綠半林殘葉帶霜紅

闕

寄永平友人

故人千里隔天涯幾度臨風動遠思賈誼上書曾伏闕

仲舒陳策欲匡時高風落落誰同調往事悠悠我獨悲
何日歸來話疇昔一樽重叙舊襟期

朔風獵獵慘寒沙關月寥寥咽暮笳放逐一心終去國
驅馳千里未還家青蠅點玉原非病滄海遺珠世所嗟
直道未容淹屈久暫勞踪跡寄天涯

陳使君山莊

新卜幽居地自偏士林爭羨使君賢數椽瀟灑臨溪屋
十畝膏腴附郭田流水斷橋芳草路淡煙疎雨落花天

秋成準擬重來此沈醉何妨一榻眠

題寺壁

僧家勝景瞰平川霧重嵐深馬不前
宛轉數聲花外鳥往來幾葉渡頭船
青山遠隔紅塵路碧殿深籠綠樹煙
聞道此中堪遁跡肯容一榻學逃禪

送徐浩

渡口潮平促去舟莫辭尊酒暫相留
弟兄聚散天邊鴈踪跡浮沈水上鷗
千里好山青入楚幾家深樹碧藏樓

知君此去情偏切堂上椿萱雪滿頭

謝惠劔

感君三尺鐵揮霍鬼神驚浩氣中心發雄風兩腋生犬
戎從此滅巢穴不時平萬里橫行去封侯賴有成

送僧

梵王生別思之子事遐征煙水浮杯渡雲山隻履行三
生塵夢醒一錫衲衣輕此去家林近飄飄物外情

送友人

有客擢扁舟相逢不暫留
衣冠重文物詩酒足風流
官路生歸興家林想舊遊
臨岐分手後乘月過蘇州

題朱慶餘閒居四首

瀟灑藏修處琴書與畫圖
白丁門外遠俗子眼前無
楚臨軒竹青青映水蒲
道人能愛靜諸事近清枯

盡日衡門閉蒼苔一徑新
客心非厭靜悟道不憂貧
白屋懸塵榻清樽憶故人
近來疎懶甚詩債後吟身

閒客幽棲處瀟然一草廬
路通元亮宅門對子雲居
按

劍心猶壯琴書樂有餘黃金都散盡收得鄴侯書
寂寥荒館下投老欲何為草色凝陳榻書聲出董帷閒
雲長作伴歸鶴獨相隨才薄知無用安貧不自危

寄張源

咫尺西江路悲歡暫莫聞青年俱未達白社莫離羣曲
徑荒秋草衡茅掩夕曛相思不相見愁絕賦停雲

題竹

瀟灑碧玉枝清風追晉賢數點渭川雨一縷湘江煙不

見鳳皇尾誰識珊瑚鞭柯亭可相遇驚聽奏鈞天

有感

盛世嗟沈伏中情快未舒途窮悲阮籍病久憶相如無
客空塵榻閒門閉草廬不勝岑絕處高卧半牀書

題山房壁

珠林春寂寂寶地夜沈沈玄奧凝神久禪機入妙深叅
同大塊理窺測至人心定處波羅蜜須從物外尋

訪請上人

曲徑遶叢林鐘聲雜梵音松風吹定衲蘿月照禪心
撫景吟行遠談玄入悟深不能塵鞅脫聊復一登臨

送范啓東

楊柳春江上東風一擢輕行囊歸客興尊酒故人情
書史名當代聲華重兩京臨岐分手處無奈別離生

客中作

十年江漢客幾度帝京遊跡比風前葉身如水上鷗
醉吟愁裏月羞對鏡中秋悵望頻回首西風憶故丘

贈韓翃

京國久知名，江河近識荆。
不辭今日醉，便有故人情。
細雨孤鴻遠，西風一櫓輕。
暫時分手去，應不負詩盟。

禁煙作

柳拖金縷拂朱欄，花撲香塵滿繡鞍。
尊酒臨風酬令節，越羅衣薄覺春寒。

閩中回

帆影隨風過富陽，櫓聲搖月下錢塘。
千山積雪凝寒碧。

夢入楓宸遶御牀

御定全唐詩卷四百六十七